

Масих Иссаны туугъаны

1 Ол кюнледе бютеу Рим империяда халкъны джазаргъа Аугустус кесардан буйрукъ чыкъды. 2 Бу биринчи джазыу Кириний Сириягъа башчылыкъ этген кёзюуде этилген эди. 3 Сора бары да, хар ким кесини шахарында джазылыргъа бардыла. 4 Аны кибик Юсюб да Даутну юйюрюнден, аны тукъумундан болгъаны себебли, Галилеяны Назарет шахарындан Иудеягъа, Бейтлехем атлы, Даутну шахарына барды. 5 Анда аны бла сёз тауусхан Мариям бла джазыллыкъ эди. Мариям а бууаз эди. 6 Ала анда болгъан заманда уа Мариямны къозлар заманы джетди 7 эм кесини биринчи Уланын тапды. Аны бёлеб, гаптешге салды, нек десегиз, алагъа къонакъ юйде джер джокъ эди. Сюрюучюле бла мёлекле. 8 Ол къралда аулакъда сюрюучюле бар эдиле, ала уа кеслерини сюрюулерини къатында кече къыйыр сакълай эдиле. 9 Билмей тургъанлай алагъа Раббийни бир мёлеги кёрюндю эм да Раббийни аламатлыгъы аланы джарытды. Ала бек къоркъдула. 10 Мёлек алагъа: «Къоркъмагъыз! Мен сизге уллу къууанчны билдиреме, ол къууанч а бютеу халкъгъа боллукъду: 11 бюгюн сизге Даутну шахарында Къутхарыучу туугъанды, Ол а Раббий Масихди. 12 Ма сизге белги: сиз Сабийни бёлениб, гаптешде джатыб тургъанлай табарсыз», — деди. 13 Сора билмей тургъанлай мёлек бла кёкдеги кёб аскер кёрюнюб, Аллахха спас этиб: 14 «Эм мийикледе Аллахха махтау, джер юсюнде Ол разы болгъан адамлада рахатлыкъ!» — деб айта эдиле. 15 Мёлекле аладан кёкге кетген заманда, сюрюучюле бир-бирлерине: «Бейтлехемге барайыкъ, анда не болгъан эсе да, Раббий бизге билдиргенни кёрейик», — дедиле. 16 Ала ашыгъыб бардыла, анда Мариямны бла Юсюбню эм гаптешде джатыб тургъан Сабийни тапдыла. 17 Кёргенлеринде уа, Сабийни юсюнден алагъа не билдирилгенин айтдыла. 18 Бютеу эшитгенле да сюрюучюлени алагъа айтхан сёзлерине сейирсиндиле. 19 Мариям а бу сёзлени барын да кесини джюрегине салыб сакълай эди. 20 Сора сюрюучюле алагъа айтылгъаныча барын да эшитгенлери эм

кѣргенлери ючюн Аллахха спас махтау сала, ызларына кѣайытдыла.